

# LA QUOTIDIANA

FMR Fundaziun Medias Rumantschas, Via da Masans 2, 7000 Cuirra, 081 544 89 11, redacziun@fmr.ch



## In nov Lido per 5,6 milliuns francs

Il responsabel da la vischnanca Vaz han dà pled e fatg davart il project da sanar il Lido al Heidsee. [Pagina 9](#)



## Festa dubla per biblioteca a Sent

La biblioteca a Sent ha fatg in viva sin 45 onns fundaziun e sin il 80avel anniversari da sia bibliotecara. [Pagina 11](#)

FMR FUNDAZIUN  
MEDIAS  
RUMANTSCHAS

südostschweiz

## LECTURA RUMANTSCHA

DAVID TRUTTMANN/FMR



### «Bler füm e pac rost»

Tant'attenziun n'ha ina sesida dal parlament dad Ilanz/Glion anc mai sveglià. Il gremi communal ha già visita questa mesemna saira dad ina sessantina da giasts, tranter auter da medias da l'entira Svizra. La raschun: la tirada «viral» dad avant duas emnas dal president communal Marcus Beer encunter seniors e petiziunarias. E tge è resultà en la sesida parlamentara? Per rumantsch ladin din ins: «Bler füm e pac rost!» E per sursilvan datti er in verset sumegliant cun «bahaultscha» e «caultscha». Pli prudent èsi da leger ussa il rapport dad Augustin Beeli che n'è betg stà l'emprima giada ad ina sesida parlamentara a Glion. Cuntrari a ses collega dal Blick. [Pagina 5](#)



La 88avla sesida dal parlament dad Ilanz/Glion. Questa mesemna passada cun publicum sco darar. FOTO AUGUSTIN BEELI

### Glieud sco stailas a Vaz?

Tgenin è il pli famus lido da quest mund? – Probabel èsi quel da Venezia. Ma enconuscentamain è la citad en la laguna confruntada cun plirs problems. In da quels: il overtourism – glied sco stailas. Ma bainprest survegn Venezia concorrenza da Vaz. Il suveran da la vischnanca decida l'entschatta da mars, sch'el vules consentir in credit da prest 6 milliuns francs per realisar in nov lido sper il Heidsee. Ed effectivamain datti glied che tema che Vaz pudess daventar in nov Venezia! [Pagina 9](#)



Il nov Lido sper il Heidsee sin la Planeira. VISUALISAZIUN MAD

### Ils stgais en bibliotecas ed archivs

Il mund rumantsch è (per fortuna!) er in mund da bibliotecas ed archivs. Quellas instituziuns èn ils stgais dal savoir e la memoria collectiva dad ina cuminanza. Ina persuna che ha tgirà durant 45 onns ina biblioteca communal è Elisabeth Poo da Sent. Schegea che tar sia emprima lectura sco uffant tegneva ella sutsura il cudesch! E forsa che Elisabeth Poo prenda per mauns proximamain il cudesch «archiv» dad Asa Hendry che gudogna in da nov Premis da literatura svizzers. [Pagina 3 e 11](#)

Ed insumma: buna lectura cun la Lectura Rumantscha!

## Il «cass Beer» ei archivaus

A Glion ha enqualin spitgau ch'ei detti in plum. Ch'il president communal Marcus Beer seretili, respectiv ch'il parlament communal giavisch quei. Nuot ei schabegiau mesjamna sera. Perquei ch'il pievel ei cumpetents da dar confidanza ni disfidanza al presidi communal – e buc il parlament.

AUGUSTIN BEELI/FMR

Ils resuns ein stai gronds e la discussiun generala medemamein. Il video ch'ei sederasaus ils 6 da fevrer 2026 ellas medias electronicas ha mussau co il president communal da Glion Marcus Beer sevila sil comité che porta ad el en casa cumin ina petiziun. Pervia da siu sedepurtar eis el seperstgisaus danovamein mesjamna sera enviers il parlament. Ils biars aspectaturs e las biaras aspectaturas che han vuliu assister ad

### «Nus surpassassen nossa cumpetenzas enviers la populaziun, las votantas ed ils votants.»

Flavio Elvedi, Glion president dil parlament communal

ina discussiun cun reprimandas e votums en caussa, ein returnai a casa senza ch'ei havessi dau in plum. «Nus surpassassen nossas cumpetenzas enviers la populaziun, las votantas ed ils votants», ha il president dil parlament, Flavio Elvedi, declarau cuortamein suenter ch'il parlament communal haveva eligi e discutau varga treis uras tenor la gliesta da tractandas. Flavio Elvedi ha puntuau ch'il parlament seigi la fallida adressa e buca autorisau da sentenziar il president communal. [Pagina 5](#)

### «Il Lido na duai betg daventar in pitschen Venezia.»

Schegea che 2–3 gondolieris amez il Heidsee si Planeiras fiss anc tut idillic. U betg? – Pagina 9




FOTO MAD/ASA HENDRY

## In premi naziunal per Asa Hendry

Il rumantsch para dad esser ina lingua vaira litterara – suenter che ils auturs engiadinais Flurina Badel ed ils frars Dumenic e Jachen Andry han gudagnà in Premi da litteratura svizzer e Leta Semadeni l'onn 2022 perfin il «Grand Prix da litteratura» – va la distincziun impurtanta quest onn ad Asa Hendry per sia ovra «archiv». Il cudesch biling rumantsch-tudestg tracta violenza ed abus en in context alpin – e quai tutga in gnerv era sur ils cunfins rumantschs ora. (fmr/sb) [Pagina 3](#)



50008

Servetsch d'abunents e da  
distribuziun: tel. 0844 226 226  
mail: abo@somedia.ch

9 771424 749004